

Morning Regional Dogri News Bulletin, 14th June 2024

मार्निंग डोगरी न्यूज़ बुलेटिन, समें. 09-20 Hrs



Headlines

- प्रधानमंत्री नरेन्द्र मोदी होर अज्ज ईटली च आयोजित होने आले जी-7 आउटरीच शिखर सम्मेलन च हिस्सा लैंगन।
- भारत नै चीन ते पाकिस्तान दे सांझे ब्यान च जम्मू कश्मीर दे हवाले गी सिरें थमां खारज करी दित्ता ऐ।
- उपराज्यपाल मनोज सिन्हा होरें अज्ज ज्येष्ठअष्टमी दे मौके पर सब्बनें गी बधाई दित्ती ऐ।
- पुलस महानिदेशक आर.आर.स्वैन होरें आखेआ जे जम्मू खित्ते च विदेशी आतंकवादिएं गी मूंह तोड़ परता देने लेई सुरक्षाबल अपने सब्बने संसाधने दा पूरी चाल्ली इस्तेमाल करा'रदे न।



PM Meet G-7

प्रधानमंत्री नरेन्द्र मोदी होर अज्ज ईटली च जी-7 शिखर सम्मेलन च हिस्सा लैंगन। ओह जी-7 आउटरीच शिखर सम्मेलन च हिस्सा लैंगन। ओह कल रातीं ईटली पुज्जे हे। उंदा ईटली दा दो दिन दा दौरा ऐ। इस दौरे पर ओह ईटली दी प्रधानमंत्री जॉर्जिया मेलोनी हुंदे साददे पर गे न। इस शिखर सम्मेलन दे अलावा ओह होर दुए मुख्हे दे नेताएं कन्नै दपक्खी बैठक लांगन। एहदे अलावा उंदा अंतर्राष्ट्रीय संगठनें कन्नै मिलने दा बी कार्यक्रम ऐ। जी-7 च कनाडा, फ्रांस, जर्मनी, ईटली, जापान, बरतानिया ते अमरीका शामिल ऐ।



MEA-Jammu

भारत नै 7 जून गी चीन ते पाकिस्तान आस्सेआ जारी इक सांझे ब्यान च जम्मू कश्मीर दे हवाले गी पूरी चाल्ली खारज करी दित्ता ऐ। मीडिया दे सुआले दा परता दिंदे होई विदेश मंत्रालय दे प्रवक्ता रणधीर जयसवाल होरें आखेआ जे जम्मू ते कश्मीर ते लददाख भारत दा अनत्रुट हिस्सा ऐ, हैन ते म्हेशां रौहग। उनें आखेआ जे होर कुसै बी मुख्ख गी इस पर टिप्पणी करने दा हक्क नेई ऐ।

जयसवाल होरें आखेआ जे इस्से सांझे ब्यान च तथाकथित चीन-पाकिस्तान आर्थिक गलियारे सीपीईसी दे तैहत गतिविधिएं ते परियोजनाएं दा बी जिक्र ऐ जेहदे किश पाकिस्तान दे नजैज कब्जे आले इलाकें बी हैन। एह इलाका भारत दा ऐ ते पाकिस्तान दा एहदे पर नजैज ते गैर कनूनी ढंगै सिर कब्जा ऐ। उनें आखेआ जे भारत इनें क्षेत्रें पर पाकिस्तान दे गैर कनूनी कब्जे गी मजबूत करने जां उसी वैद्य बनाने आस्तै होर कुसै बी मुख्य दी कुसै बी गैह दा सख्ती नै विरोध करदा ऐ ते उसी नामंजूर करदा ऐ, जेहड़ा भारत दी संप्रभुता ते क्षेत्रीय अखंडता गी प्रभावत करदा ऐ।



NSA Appointment

अजीत डोभाल होरें गी इक बारी परतियै राष्ट्रीय सुरक्षा सलाहकार ते डॉ. पी.के.मिश्रा होरें गी फही प्रधानमंत्री हुंदा मुख्य सचिव नियुक्त कीता गोआ ऐ। मंत्रिमंडल दी नियुक्ति समिति नै कल इनें नियुक्तिएं गी मंजूरी दित्ती ते एह नियुक्तियां 10 जून थमां प्रभावी न। कार्मिक, लोक शकैत ते पेंशन मंत्रालय नै आखेआ ऐ जे साबका आईपीएस श्री डोभाल ते सांबा आईएस श्री मिश्रा हुंदी नियुक्ति प्रधानमंत्री हुंदे कार्जकाल जां अगले हुक्म तगर जेहड़ा बी पैहले होए तगर प्रभावी होग। नियुक्ति समिति नै रटैर प्रशासनिक अधिकारी अमित खरे ते तरुण कपूर होरें गी प्रधानमंत्री हुंदे सलाहकार दे तौर पर नियुक्त करने दी मंजूरी दित्ती ऐ। नियुक्ति दे मगरा श्री डोभाल होरें रक्षा मंत्री राजनाथ सिंह हुंदे नै कल नमीं दिल्ली च मलाटी कीती।



LS Speaker

लोकसभा अध्यक्ष दा चुनां 26 जून गी होग। 18में लोकसभा दा पैहला सत्र इस म्हीने दी 24 तरीक थमां होग। सत्र दरान नमें चुने गोदे सदस्यें गी औहदे ते राजदारी दी सगंध दोआई जाग। लोकसभा ते राज्यसभा दी सांझी बैठक च राष्ट्रपति द्रौपदी मुर्मू हुंदा संबोधन होग। उंदे संबोधन पर बी इस सत्र च चर्चा कीती जाग। राज्यसभा दा सत्र इस म्हीने दी 27 तरीक थमां शुरू होग। संसद सत्र अगले म्हीने दी त्रै तरीक गी खत्म होग।



Centre PM Poshan

शिक्षा मंत्रालय नै सब्बने राज्यें ते केन्द्र शासत प्रदेशें गी इक परामर्श जारी कीता ऐ जे प्रधानमंत्री पोषण तैहत विशेष जरूरतें आले बच्चें गी मुफ्त ते लाजमी शिक्षा दे अधिकारें ते कन्नो कन्नी उंदे लेई पोषण ते खुराक गी बी जकीनी बनाया जाई सकै।

मंत्रालय नै इक ब्याने च आखेआ जे एह परामर्श इस गल्लै गी जकीनी बनाने लेई जरूरी उपाएं दी लोड़ पर जोर दिंदी ऐ जे सरकारी जां सरकारी सहायता आले जां विशेष स्कूलें च पढ़ने आले सब्बने खास जरूरतं आले बच्चें गी मुफ्त ते जरूरी शिक्षा दे अधिकार उपलब्ध करोआए जान। इंदे च मुफ्त वर्दी, कताबां, समग्र शिक्षा योजना तैहत समावेशी शिक्षा ते पीएम पोषण तैहत स्कूलें च दित्ती जाने आली मुफ्त दपैहरी आली रूट्टी यानि मिड-डे मील बी शामिल ऐ।



Lt. Governor Jyeshtha Ashtami

उपराज्यपाल मनोज सिन्हा होरें जेष्ठ अष्टमी दे मौके पर सब्बनें गी अपनियां शुभा-कामना दित्तियां न। जेष्ठ अष्टमी अज्ज मनाई जा'रदी ऐ। अपने सनेह च उपराज्यपाल होरें होरें पवित्र मौके पर सब्बनें गी ते खास तौर पर कश्मीरी पंडितें गी शुभकामनां दित्तियां। उनें सब्बने दी तरक्की, खुशहाली दी कामना बी कीती। उनें माता क्षीर भवानी होरें गी सब्बने गी सेई बत्त दस्सने दी प्रार्थना कीती। उनें मेद जाहर कीती जे एह जेष्ठ अष्टमी आपसी भाईचारे गी मजबूती देग ते सब्बने पर अपनी कृपा बरसांगन।



DGP-Jammu

पुलस महानिदेशक आर.आर.स्वैन होरें आखेआ जे पुलस ते सुरक्षा अजेंसियां जम्मू खित्ते च विदेशी आतंकवादिएं गी बनकदा परता देने लेई अपने सारे संसाधने दा इस्तेमाल करा'रदियां न। सुरक्षा बलें गी स्तर्क, सौहगा ते चौकस रौहने ते आपूं चे तालमेल बनाने लेई गलाया गेआ ऐ। कठुआ जिले दे सुरक्षा हालात दा जायजा लैने मगरा जम्मू च पत्रकारें कन्नै गल्ल करदे होई उनें आखेआ जे एह साफ ऐ जे जम्मू खित्ते च विदेशी आतंकवादिएं दी घुसपैठ कीह कराई गई ऐ। इस करी खित्ते च सुरक्षा चुनौतियां पैदा होइयां न। उनें आखेआ जे आतंकवादिएं दे आका जिसलै मकामी लोकें गी आतंकवाद च शामिल करोआने च नाकाम रौहंदे न तां फही ओह कब्जा रेखा दे उस भेठा दा आतंकवादिएं गी इस भेठा घुसपैठ करोआंदे न तां जे शांतिपूर्ण माहौल गी बगाड़ेआ जाई सकै। पुलस ते होर दुइयां सुरक्षा अजेंसियां आतंकवादिएं गी बनकदा परता देने लेई हर संभव कोशश करा'रदियां न। डीजीपी होरें आखेआ जे जम्मू खित्ते दी कठिन ते चुनौतीपूर्ण भुगौलिक परिस्थिति ऐ। उनें आखेआ जे किश तत्व अपने जमीर गी किश पैसे ते नशीले पदार्थ लेई बेची दिंदे न। इत्थें एह दस्सना लाजमी ऐ जे पिछले किश दिनें थमां कठुआ, रियासी, भद्रवाह ते डोडा च आतंकवादी हमले ते टाकरे होए। उपराज्यपाल मनोज सिन्हा होरें जम्मू च 11 जून गी इक उच्च सतह दी सुरक्षा जायजा बैठक लाई।

12 जून गी कठुआ च होए दे टाकरे च 2 विदेशी आतंकवादी मारे गे ते सीआरपीएफ दा इक जुआन शहीद होई गेआ। इस टाकरे च इक आम नागरिक बी घायल होआ। 9 जून गी रियासी च आतंकवादिणं श्रद्धालुणं दी बस पर हमला कीता हा जेहदे च 9 लोक मारे गे ते केई होर घायल होई गे। जम्मू दे एडीजीपी आनंद जैन हुंदे मूजब कठुआ रियासी इलाके च किश होर आतंकवादी मजूद होई सकदे न ते तपाशी अभियान जारी ऐ।



Amarnath Yatra

कठुआ दे डिप्टी कमीशनर डॉ. राकेश मिन्हास होरें औंदी श्री अमरनाथ जी दी यात्रा सरबंधी तैआरिणं दा लखनपुर च निरीक्षण कीता। डिप्टी कमीशनर होरें लखनपुर म्यूनिसिपल कमेटी गी हिदायत कीती जे ओह सारे शौचालयें गी इस्तेमाल करने जोग बनान ते लोड़चदा कम्म सबूरा करन। डिप्टी कमीशनर होरें 12 ज्हार 5 सौ श्रद्धालु दे रौहने बौहने दी सुविधा। आरएफआईडी पंजीकरण सरबंधी काउंटर ते श्रद्धालुणं लेई लोड़चदे होर दुए इंतजाम बारे बी चर्चा कीती।



Sudhmahadev Mela

त्रै रोजा ऐतिहासक सुद्धमहादेव मेला इस म्हीने 21 जून थमां शुरू होआ'रदा ऐ। उधमपुर दियां डिप्टी कमीशनर सलोनी राय होरें बक्ख-बक्ख मैहकमें दे अफसरें कन्नै इक बैठक लाई ते इस मेले गी सूचारू ढंगै सिर तोड़ चाढ़ने लेई इंतजामें दा जायजा लैता। इस दरान बक्ख-बक्ख इंतजामें जियां सुरक्षा, साफ सफाई, पीने आला पानी, सेहत सरबंधी दिक्खभाल, यातायात, ट्रैफिक प्रबंधन, बिजली दी सप्लाई ते शिड़क दे रख रखाव पर चर्चा होई। बैठक गी संबोधत करदे होई डिप्टी कमीशनर होरें अफसरें गी हिदायत कीती जे ओह आपूं चै नेड़मा तालमेल बनाइयै कम्म करन ते जरूरी ते लोड़चदे इंतजामें गी खीरी रूप समें सिर देन। तां जे मेला सूचारू ढंगै सिर चली सकै। उनें मकामी मेला कमेटिणं दे मिंबरें गी अपील कीती जे अगगे औन ते इस मेले गी सफल बनान।



Tamdeh

अज्जै दे ध्याड़े तमदेह मनाया जा'रदा ऐ। डोगरें लेई एह ध्याड़ा बड़ा खास मन्नेआ जंदा ऐ, जिस दिन सूर्य भगवान हुंदी पूजा कीती जंदी ऐ, नदिएं, सरोवरें च शनान कीता जंदा ऐ ते पित्तरे दे नां पर दान-पुन्न बी कीता जंदा ऐ। जेहदे च पक्खियां, फल ते घड़े मनसे जंदे न। अज्जै दे ध्याड़े केइएं थाहरें लोकें आस्सेआ रलियै भंडारा ते शबील बी लाई जंदी ऐ।



DC-Kathua

कठुआ दे डिप्टी कमीशनर डॉ. राकेश मिन्हास होरें कल जिले च हाड़ खलाफ उपाएं बारे इक बैठक च व्यापक चर्चा कीती। इस बैठक च हाड़ गी काबू करने आले मैहकमे थमां बक्ख-बक्ख घड़ें, एकजीक्यूटिव इंजीनियर फलड , सेंद्रल इंस्पेक्टर एसडीआरएफ ते मुत्तलका मैहकमे दे अधिकारिएं हिस्सा लैता। डीसी होरें मैहकमे ते बक्ख-बक्ख अजेसिएं बश्कार तालमेल बनाइयै कम्म करने उप्पर जोर दित्ता तां जे जान माल गी बचाया जाई सकै। इस सिलसिले च डीसी दफतर परिसर च इक सेंद्रलास्ड कंट्रोल रूम बी कायम कीता जाग। तां जे स्थिति च नेड़मी तक्क रक्खियै उसगी समें सिर काबू कीता जाई सकै। इनें इलाकें च वायरलैस सेट दा इस्तेमाल कीता जा। इनें इलाकें च पंजीतीर्थी, बिलावर, जखोल, जरनैली शिड़क राजबाग पुल दे कोल हाड़ गी काबू करने आले फलड कंट्रोल गार्ज रीडर हंट मुखडपुर, कोरेपुनू ते कीरीयान गडेयाल शामिल न।



Child Labour

जिला प्रशासन नै निक्के बच्चें कोला कम्म कराने आले यानि चाइल्ड लेबर जुर्म च शामिल 15 बपारी संगठनें खलाफ एफआईआर दर्ज कीती ऐ। इक बैठक दी समीक्षा करदे होई डिप्टी कमीशनर सचिन कुमार वैश्य होरें मुत्तलका अफसरें गी निर्देश दित्ते जे ओह लगातार ते नेड़मी तक्क बनाई रक्खन तां जे उनें बच्चें दी पंछान कीती जाई सकै जेहड़े शिड़कें पर समेयान बेचदे न जा फही भिक्ख बगैरा मंगदे न। उनें इस गल्लै पर जोर पाया जे जिले च इयै नेह जुर्म गी बिंद बी बर्दाश्त नेई कीता जाग। डीसी होरें उनें संगठने खलाफ सख्त कारवाई करने लेई ते उंदे पंजीकरण खारज करने दे निर्देश दित्ते जेहड़े बच्चें कोला डाब्बे च कम्म करोआंदे न जां फही जबरदस्ती भिक्ख मंगवांदे न। एसएसपी डॉ. विनोद कुमा होरें बी जिले च नेह जुर्म खलाफ जीरो टालरेंस पॉलिसी आले नीति अपनाने बारे गलाया।

एहदे अलावा मुख् शिक्षा अधिकारी नै समाज कल्याण मैह्कमे गी आखेआ गेआ ऐ जे रेस्क्यू कीते गेदे इनें बच्चे गी अपनी दिक्ख-रिक्ख च शिक्षा उपलब्ध करोआई जा ।

